

Filipenses

1 Jesucristo hõjts xmioonsähajp, hõõch Pablo mõõdä Timoteo. Hõjts mijts hädaa nocy nyajnäjaayõõby mäduhñtiä mijts ja'a Diosmädia'agy hajxy jim mbanõcxy maa ja'a cajpt xiõhatiän Filipos, nägõxiä mõõdä mwiindsõnhajpä jii by tsajtõgootypä, mõõd hajxy jii by puhbejpä. ²Weenä Dios hajxy xmio'oy hoyhajt weenhajt, ja'a nDeedyhãjtãm hajxy jim tsajpootypä mõõdä Jesucristo hajxy nWiindsõnhãjtãmbä.

³Naaghõoc-hõch mijts njahmiejtsta'agy, nnämäabiõch ja'a Dios “Dioscujú'uyäp” maa ja'a mijtscõxpän. ⁴Naaghõoc-hõch ja'a Dios nba'ya'axy, nmäyujwäämbiõch hoyhajt weenhajt ja'a mijtscõxpä. Coochä Dios hänajty nba'ya'axy ja'a mijtscõxpä, jootcújc-hõch hänajty nnijjãwõ'yii, ⁵je'eguiõxpä coo ja'a Diosmädia'agy hajxy näguipxy tõõ nyajwã'xãm, mänaa hajxy tõõ mmädoodsoõnãn hõxtä je'enä jäda'anãbaadyñä. ⁶Ja'a Dios ja'a hodiung yajtsohndaac ja'a mijtscõxpä. Nmõõdhõchä tõyhajt jaduñ coo ja'a Dios ja'a tiung hoy yajtu'uyo'oya'ãn hõxtä coonä Jesucristo hänajty quiädaactãgatsa'ãn. ⁷Páadyhõchä

tõyhajt nmõõdä cooch mijts njaançh tehñ chocy njaançh tehñ pia'häyoy, coo ja'a Dios hajxy xpiuhbéjtãm näguipxy, homiáajõch nhity, hoy piujxtõgootiä, hoy yhagujcä, cooch hänajty nmädia'agy coo ja'a Diosmädia'agy tiõyyä. ⁸Najuõõbiä Dios cooch mijts njaançh tehñ chocy njaançh tehñ pia'häyoy nägõxiä, nebiä Jesucristo hajxy xchõjcãm. ⁹Nmänuu'xtáacypiõchä Dios coo hajxy hamuumdu'joot mjaac niçhoc mjaac nibia'häyowõõjät, coo hajxy hoy mguhwijyhãdät, ¹⁰neby hajxy jaduñ mnajuõ'õwät mwiimbwät ja'a hojiatypä hajxy. Jaduñ hajxy mhídät hawa'adstuum nebiä Dios hajxy xyajmädsõjcãm, hõxtä coonä Jesucristo hänajty quiädaactãgatsa'ãn. ¹¹Xpiuhbédäp ja'a Jesucristo hajxy neby hajxy jaduñ hoy mwãdítät. Jaduñdsä Dios hoy quiähxõ'õgät coo miõjjä coo jiaançhä.

¹²Hermanodõjc, huuc wiinjuõ'õw hajxy jaduñ; cooch yaa ndsumyçhãna'ay, maas hõyhõchä Diosmädia'agy jaduñ yaa nyajwa'xy. ¹³Nägõxiä cu'ughajxy tõõ miädoyhaty coochä Jesucristo miädia'agy

ngudsumyčhänä'awøoyä, nägøxiä, møødä soldadohajxy jim hadänaabiä maa ja'a gobernador tiøjcän. ¹⁴Ja'a Jesucristo miädiá'agyhøch ngudsumyčhänä'awøøby. Cábøch ndajy nmay. Coočh nga'a tajy nga'a may, paadiä hermanodøjc-hajxy nämay quia'a nä'ägädä taj quia'a nä'ägädä maabiä coo ja'a Diosmädia'agy hajxy yajwa'xy, hoy hajxy cu jia tsúumäbä. Cab hajxy nä'ägädä tsähgøøy ni weentiä. Hix, høøch hajxy jaduhñ xpiahixp.

¹⁵⁻¹⁷Paadiä Diosmädia'agy hajxy yajwa'xy cooçh hajxy xchocy xpia'häyoy. Hojioot hajxy jiaančh tehñ miøød. Näjuøøby hajxy jaduhñ cooçhä Diosmädia'agy ngudsumyčhänä'awøøy. Pero jii hajxy näje'ebä, paadiä Diosmädia'agy hajxy yajwa'xy, cooçh hajxy xmiädsiphaty. Tøyhajt jaduhñ. Je'ečh hajxy xyajmädsøjp cooçh yaa ndsaačhpögät pujxtøgooty. Cabä hojioot hajxy nä'ägädä møødä ja'a høøchcøxpä. ¹⁸Pero cábøch jaduhñ nmøjpäda'agy, hóyhøch hajxy jaduhñ xjia mädsiphaty.

Xoondáacpøch jaduhñ coo ja'a Jesucristo hajxy miädia'agy, hoy hojioot hajxy quia'a ja møødä ja'a høøchcøxpä. ¹⁹Y jaac xoonda'agáambøch jaduhñ. Nnajuøøbiøch cooçh hodium nmähmøøwa'añ. Hix, mijts ja'a Dios hoyhajt weenhajt mmäyujwaamby ja'a høøchcøxpä. Y xpuihbéjpøçhä Dioshespíritu ja'a Jesucristocøxpä. ²⁰Cábøçhä njoot nä'ägädä tsoy cooçh ndsähgøøwät mänáajøçhä

Jesucristo hänäjty nmädia'aguiän. Cábøch mänaa ndsähgøøy ndsähdiuñ. Chójpjøch njoot jaduhñ cooçhä Jesucristo nyajcähxø'ogät coo miøjjä coo jiaančhä, hóyhøch njadehm quiuhø'ogø'owät.

²¹Madúhñtiøch yaa njaac jugyhaty, nyajcähxø'ogäbøçhä Jesucristo coo miøjjä coo jiaančhä. Y cooçh nhó'nät, maas hoy hänäjty quiahxø'ogaannä coo miøjjä coo jiaančhä. Mänitøch jim nnøcxaannä maa je'le wyiinduumän. ²²⁻²³Mejstú'ujøçhä njoot nyajmøødmädia'agy. Cooçh nhó'ogät, mänitøch cu nnøcxnä maa ja'a Jesucristän. Maas jootcújc-høch jim nnijäwøøyyänät. Pero cooçh yaa njaac jugyhädät, maas hóyhøçhä Jesucristo jaduhñ njaac mädüñät. Cábøch ndehm yhoñajuøøy pø maas hoy cooçh nhó'nät, o pø caj. ²⁴Høøch jaduhñ mänaamb cooçh hit nga'a tsoj hó'ogät; jaduhñhøch mijts ja'a Diosmädia'agy tehngajnä njaac yajnähixø'owät. ²⁵Nmøødhøçhä tøyhajt jaduhñ cooçh mijts njaac møødhida'añ. Njaac yajnähixø'owáambiøch mijts tehngajnä, neby hajxy jaduhñ maas hoy mmäbøgät, neby hajxy jaduhñ mjaac xoondaacpøgät. ²⁶Cooçhä Jesucristo jim xyajnøcxtägätsät maa mijtsän, mänit hajxy mmäna'ana'añ coo tiøyyä coo Jesucristo miøjjä jiaančhä.

²⁷Naxiä Jesucristo miädia'agy hajxy mdehm yajtúunät. Jaduhñä Diosmädia'agy hajxy näguipxy myajwá'xät tehngajnä, hóyhøch jim nga'a ja nõcxät maa mijtsän. ²⁸Cabä mmädsip hajxy

mnä'ägädä tsähg'owät. Jaduhñ hajxy ñaju'owa'añ coo hajxy haxøgtuum yajca'awa'añijäm ja'a Diósäm, møød coo mijts ja'a Dios xpiäda'aga'añ hodiium. ²⁹⁻³⁰Tiuumbiä Dios ja'a mayhajt coo hajxy xyajnähdijy coo ja'a miädia'agy hajxy mmäb'ójcät ja'a Jesucristocøxpä, nébiøch cham ndsaaçhpøquiän. Tøøch hajxy hamdsoo xyhixy xmiädoy cooçh yaa ndsaaçhpøcy ja'a Jesucristocø xpä.

2 Coö mijts ja'a Jesucristo xchocy, paady hajxy xjiotcapxmøcpøcy. Coö mijts ja'a Dioshespíritu tu'ugmädia'agy mmøødhity, paady hajxy hamiñ haxøpy mniçhocy mnibia'häyoyii. ²Jadúhñhøch njoot jiaançh tehñ chocy coo hajxy tu'ugmädia'agy mhídät. Coö hajxy mniçhoc mnibia'häyow'øjät, maas hóyhøch nnijiäw'øw'øjät. ³Ca'a mhamdsoo wiinmahñdy hajxy mwi'i yajtuñ. Ca'a hajxy mniguiumayii. Jaduhñ hajxy mmäná'anät coo ja'a mmägu'ughajpä miaas jaty quejee miich. ⁴Hamiñ haxøpy hajxy mnigwieendähad'øjät.

⁵Mbahixäp ja'a Jesucristo hajxy neby je'e jecy wiädiñtiän. ⁶Hoyyä Jesucristo jia Dioshuungä, caj jiootma'ty coo ñämaayyä coo yaa jiäya'ayhadät hädaa yaabä naaxwiin. ⁷Coo yaa jiäya'ayhajty, yhøxhijx yhamdsoo cuhdajt jaduhñän. Jaduhñ ñibiädaacänä nebiä moonsän. Cab hänajty hamdsooyyä miøjhada'añ. ⁸Mänitä Dios miädia'agy quiudiuunä coo yh'ogät. Hoçhähdiuunnä jim cruzcøxp miøjpahbejtä. ⁹Coo

ja'a Jesucristo quiudiuunë neby ñämaayyän, paadiä yajmøjhajtä ja'a Diósäm. Ni pøn jaduhñ quia'a mabaady nebiä Jesucristän. ¹⁰Weenä Jesucristo hajxy nägøxiä wyiingudsähg'øcy, jim tsajpootyp, møød hädaa yaabä naaxwiin, homiaajä. ¹¹Weenä Jesucristo hajxy nägøxiä quiapxpaady coo hajxy wyiindsønhaty. Jaduhñä Dios jim quiähx'ogät mõj jaançh, ja'a nDeedyhajtäm.

¹²Mägu'ughajpädøjc, mänáajøch jim nhitiän maa mijtshajxiän, xmiäb'ójcäbøçhä nmädia'agy hajxy hänajty. Hoorä, cooçh yaa jäguem nhijnä, miaas tsøjpiøch njoot cooçh nmädia'agy hajxy tehngajnä xmiäb'ójcät. Naxiä Diosmädia'agy hajxy mdehñ miäb'ogät, neby hajxy jaduhñ hodiium mmähm'øwät. Naxiä Dios hajxy mdehñ wyiingudsähg'øwät. Cab hajxy nä'ä nägoodä mnä'ä niguiumay'øjät. ¹³Jaduhñä Dios jioot chocy coo hajxy hoy mwädítät. Xpiuhbédäp ja'a Dios hajxy jaduhñ.

¹⁴Hoy hajxy mwädítät. Cab hajxy tii mwi'i chippädá'agät. Cab hajxy tijaty myajniguiuhøj'øw'øjät. ¹⁵⁻¹⁶Jaduhñ hajxy hoy mwädítät nebiä Dioshuungän maa ja'a ca'awiindøyhäna'c-hagujcän. Coö ja'a Diosmädia'agy hajxy myajnähix'øwät, jaduhñ hajxy mwädítät nebiä jøøn yhajjiiän hagoonstuum; coö jäya'ayhajxy jaduhñ miäb'ogät, mänit hajxy hodiium piäda'ag'øjät. Coö hajxy mgudiünät neby hajxy chaa nnäma'ayän, mänitøch nxoondá'agät, mänaa ja'a Jesucristo hänajty jadähooc

quiädaactägatsa'añän.
Cähxø'øgaamb jaduhñ cooçh
hänajty hoy tøø nduñ maa
mijtsçøxpän. ¹⁷Coo Diosmädia'agy
hajxy hamuumdu'joot mmäböcy,
páadyhöch nxoonda'agy, hóyhöch
cu nja ho'og. Chójpjoch njoot coo
hajxy nmøødxoondá'agät. ¹⁸Tsøgxä
hajxy jaduhñ xoondáacäm.

¹⁹Coo ja'a Jesucristo ja'a
nWiindsøn'hájtäm jaduhñ
miáná'anät, mobädájpøch mijts
ja'a Timoteo nyajnäguexa'añ.
Cooçhä Timoteo min jadähooc
xyhawaanä coo mijts hoy mhity,
hóyhöch hänajty nnijiäwø'øwa'añii.

²⁰Páadyhöçhä Timoteo jim
nguxa'añ cooçh je'e nidiuhm
xmiøødhity tu'ugmädia'agy maa
mijtsçøxpän. Xpiuhbedaamb
mijts jaduhñ hamuumdu'joot.

²¹Ja'a häna'c-hajxy jaac yaabä,
yhamdsoo tuung hajxy tiuumby.
Cabä Jesucristo tiung hajxy
hamuumdu'joot tiunaanä.

²²Mnajuøøby hajxy jaduhñ cooçhä
Timoteo hoy xmiøødtuñ maa ja'a
Diosmädia'agy myiñän, nébiøch
nhamdsoo huungän. ²³Mänítøçhä
Timoteo nguexät cooçh hänajty
tøø nnajuø'øy pø pädsømáambøch.

²⁴Coo ja'a Dios jaduhñ miáná'anät,
mobädájpøch jim nnøcxa'añ maa
mijtsän.

²⁵Tøøch mijts ja'a hermano
Epafrodito hijty xyajnäguexy
cooçh jaduhñ xpiuhbédät.
Hóyhöch jaduhñ xjiaançh
møødtuñ cooçhä Diosmädia'agy
nyajwa'xy. Hahixøøby cooçh
mijts nyajnäguejxtägätsät,
²⁶je'eguiøxpä coo mijts xjia
wi'i quihijxtägatsa'añ. Jaançh

tehm tiajp jaançh tehm miáabiäc
je'eduhñ coo mijts tøø mmädyohaty
coo hijty piøgyii. ²⁷Tøyhajt hijty
piøgyii. Ja weenjaty jaduhñ
quia'a ho'cy. Miøødhajt ja'a Dios
hojioot ja'a Epafroditoçxpä
møød høøçhcøxpä. Coo
häxøpy tøø yho'ogy, maas
hanáxiøch häxøpy njootmayhaty.
²⁸Páadyhöch mijts ja'a Epafrodito
nyajnäguejxtägatsa'añ, neby hajxy
jaduhñ mxoondá'agät coo mijts
jadähooc xñämejtstägatsa'añ.
Coo hajxy jaduhñ mxoondá'agät,
mänítøch jaduhñ hoy
nnijiäwø'øyyäbät. ²⁹Coo jim
miédsät maa mijtsän, xi'ig
xon hajxy myajpøø'xät nebiä
hermanän. Homianaajä hajxy
mwiingudsähgø'øwät pønjiatiä
Diosmädia'agy pawädijp nebiä
Epafrodito piawäditiän. ³⁰Paady
je'e ja weenjaty quia'a ho'cy
cooçh jaduhñ xmiøødtuñ maa ja'a
Diosmädia'agy myiñän. Pero cabä
miøjpäda'agy coo ja weenjaty tøø
quia'a ho'ogy. Cooçh yaa xpiuhbety,
mijts yaa xñähduunduutp. Hix,
cábøch mijts hoy yaa xpiuhbeda'añ;
jäguem mijts jaduhñ xpiaatä.

3 Hermanodøjc, tsøg
hajxy xoondáacäm ja'a
Diosçøxpä. Chaa hajxy jadähooc
nhawaandägájtänäm neby hajxy
tøø nhuuc nämaabiän. Coo hädaa
mädia'agy hajxy jaduhñ myajtúnät,
cab hajxy myajwiinhøønät.
Ni mänájøch jaduhñ nga'a
nänuuxø'øy, hoñaaghoocä
hajxy jaduhñ nhawáañamät.
²Mnigwieendähadøøjpä hajxy
maa häna'c-hajxy jaançh tehm
quia'awiindøybän, ja'a hajxy

jaduh_n mänaambä coo hajxy tsipcøxp nyajcircuncidarhajtämät. ³Tøyhajtä Dios hajxy xjiaančh circuncidarhajtäm coo hajxy nwiingudsähgøøyyäm. YhEsprituhaam hajxy nwiingudsähgøøyyäm. Jootcujc hajxy jaduh_n nniijäwøøyyäm ja'a Jesucristocøxpä. Cab hajxy nmänáanäm coo ja'a jecyquihdujt hajxy xyajnáhwáatsäm. ⁴Høøch, jadúhnhøch hijty nmänaambä cooc tyijy ja'a jecyquihdujt hajxy xyajnáhwáatsäm. Pedyíijøch hijty ngudiuñ nej yhane'emiän. Cab jaduh_n pøn ñä'ägä cudiuñ nébiøch hijty ngudiuñän. ⁵Judíoshøch høøch. Judíospøch hijty ndajhajpy ndeedyhajpy. Benjamínhøch hijty nhaphajpy ndeedyhajpy. Mänáajøch nmiñ nga'ayän, cuductujxøøjøch hoy nyajcircuncidarhaty, nebiä judíoshajxy quihdujthatiän. Ja'a fariseos miädiá'agyhøch hijty nbanøcxäp. ⁶Nägø'ø nädécypiøch hijty ngudiuñ, høxtä ja'a hermanobáadyhøch hijty nyajtsaächpøcy. Jaančh teh_m piedyíijøchä ley hijty ngudiuñ; cábøch hijty pøn waamb xñäma'ay. ⁷Jaančh teh_m ñiguiumáayäbøch hijty cooçh hijty jaduh_n hoy ngudiuñ. Pero cábøch nniguiumayáanänä, je'eguiøxpä cooçhä Jesucristo miädia'agy tøø nbadu'ubøjcänä. ⁸Cøjxhøch nnajtshixøøñä mädyíijátýhøch hijty nyajtuumb. Páadyhøch tøø nnajtshixøøñä, nébiøchä Jesucristo miädia'agy jaduh_n hoy nbanøcxät. Maas tsoobáatnäp hädaa cooçhä Jesucristo tu'ugmädia'agy nmøødhijnä ja'a nWiindsøn_nhajpiä.

⁹Cooçhä Jesucristo miädia'agy nmäbøjcä, páadyhøchä Dios tøø xyajnáhwa'ačh. Cáboch nmänaanä coogøch tyijy ja'a jecyquihdujt xyajnáhwá'adsät. ¹⁰Chøjpiøch njoot cooçhä Jesucristo tu'ugmädia'agy nmøødhijnät. Coo ja'a Jesucristo jadähooc jiuypijøjcy, paadiä mäjaa jaduh_n miooyyä cooçh jaduh_n xpiuhbédät. Chogáambiøch njoot cooçh ndsaächpøgät ja'a Jesucristocøxpä. Høxtä ho'ogáambøch jaduh_n neby je'e yho'quiän. ¹¹Páadyhøch njoot jaduh_n chocy coo ja'a Dios jaduh_n ween miäna'añ cooçh xyagjuypijøjtägätsät.

¹²⁻¹⁴Hermanodøjc, cábøch jaduh_n nmäna'añ cooçh tøø nyajpedyii. Cáboch njahmiejtsnä nébiøch hijty nwädity. Cooçhä Jesucristo xmioonsähaty, páadyhøch miädia'agy nyajcopcøøyyänä, nébiøch jaduh_n ca'xy ngudiúunänät. Ñä'ägädä tsøjpiøch njoot nägø'ø nädécypiä cooçh ca'xy ngudiúnät. Jadúhnhøchä Dios jim xmiøjyá'axät tsajpootyp, je'eguiøxpä cooçhä Jesucristo tøø xyajnáhwa'ačh.

¹⁵Tsøg hajxy tu'ugcopc hjítäm nébiøch jaduh_n naamnä ngujaayän, pønjatý ca'xy cudiuumb. Pønjatý xquia'a møødhjítäm tu'ugcopc, weenä tøyhajt hajxy mio'oyíjäm ja'a Díosäm. ¹⁶Tsøg hajxy tehngajnä yajtu'uyóhyäm nebiä Dios hajxy xyajnáhixøøyyäm.

¹⁷Hermanodøjc, xpiahíxäbøch hajxy jaduh_n nébiøch hoy nwäditiän. Xpiahíxpøch hajxy jaduh_n nämay. Mbahíxäp hajxy je'eduhmbä. ¹⁸Tøøch mijts mayhooc nnäma'ay coo ja'a høn_ndaacpähajxy

may wiädity. Cábäc tyijy jaduñ tiöyyä coo ja'a Jesucristo hajxy tøø nñähho'túútäm cruzcøxp. Cháajäts jadähooç nnämäaguuiumbä. Jaançh tehñ hoñäjøøñä jaduñ. ¹⁹Haxøøgtuum hajxy yhida'añ cøjxta'axiøø. Hiç, cabä Dios hajxy wyiingudsähgø'øy. Yhamdsoo cuhdujt hajxy yajtuumbý. Tijaty maas hoçhähdiuunnä, je'e hajxy ñä'ägä cumaaby. Je'e hajxy jaduñ wyi'i chojpy coo hoyhajt weenhajt hajxy cu piaaty hädaa yaabä naaxwiin. ²⁰Pero højtshájtäm, jim højts njoot hamuumdu'joot nbädäacäm tsajpootyp. Ja'a Jesucristo, ja'a hajxy nWiindsøñhájtämbä, je'e hajxy xyajñähwáatsäm. Je'e hajxy nhahíçxäm coo jim choona'añ tsajpootyp, coo yaa miänaca'añ hädaa yaabä naaxwiin. ²¹Mänitä nnaaxni'xhajxy xyhädiuunnägatsáañänä. Jaduñ hajxy yajxón ngähxø'øgáañäm nebiä Jesucristo yhamdsoo ni'x yhamdsoo copcän. Miøødä Jesucristo cuhdujt jim cøxp møød hädaa yaabä naaxwiin homiaajä. Paadiä nnaaxni'xhajxy xyhädiuunnägatsáañäm coo cuhdujt jaduñ miøødä.

4 Hermanodøjc, njaançh tehñ chojpy njaançh tehñ pia'häyóobiøch mijts jaduñ. Páadyhöçh nja wi'i ñøcxa'añ maa mijtsän. Jaançh tehñ xioonädäacpøch jaduñ ja'a mijtsøxpä, je'eguiøxpä coo mijts ja'a Diosmädia'agy jaançh tehñ yhoy mgudiun, coo hajxy jim mnøcxa'añ tsajpootyp. Tehngajnä ja'a Dios hajxy mmøødhídät tu'ugmädia'agy.

²Evodia møødä Síntique, mijts nmänuu'xtaacypy coo hajxy mhídät tu'ugmädia'agy. Jaduñnä Diosmädia'agy hajxy hoy myajtuunmúgät. ³Chaads miich mägu'ughajpä, hóyhøch miich xjiaançh tehñ jiamiøødhaty, tunä mayhajt, mmägáxpäp mhané'emäp ja'a Evodia møødä Síntique coo hajxy tu'ugmädia'agy yhíçñät. Näguípxyhøçhä Diosmädia'agy hajxy hoy nmøødyajwa'xy, møødä Clemente møødä hermanodøjc-hajxy may. Jim hajxy nøcxy yhidaannä tsajpootyp cøjxta'axiøø.

⁴Tehngajnä hajxy homiänaajä mxoondá'agät ja'a Dioscøxpä. ⁵Hoy hajxy mjaançh tehñ jiäya'ayhádat cu'ughagujc. Mäwiingoomb jaduñ coo ja'a Jesucristo quiädaactägatsa'añ. ⁶Cab hajxy tii mdaj mmáyät. Dios hajxy mmäyujwá'anäp coo hajxy xpiuhbédät. Mnämä'awäp ja'a Dios hajxy jaduñ "Dioscujú'uyäp." ⁷Mänitä Dios hajxy xmió'owät hoyhajt weenhajt. Jaduñ hajxy tii mga'a taj mga'a máañät. Jagoo hajxy jaduñ mjaac taj mjaac máyät ja'a Jesucristocøxpä. Ni pøn jaduñ xquia'a puhbédät nebiä Dios hajxy xpiuhbetiän.

⁸Hermanodøjc, chaaçhä nocyhädiún nyajmayaannä. Je'e hajxy myajcopcø'øwäp mädyiijaty jaduñ tøyhajt, mädyiijaty jaduñ howyiingudsähgøøñä, mädyiijaty jaduñ hoy, mädyiijaty jaduñ yajxón, mädyiijaty jaduñ hoguiumaañä.

⁹Tehngajnä hajxy hoy mgudiúnät neby hajxy tøø nyajñähixø'øyän.

Jadúhnhøch hajxy xpiahíxät nébiøch hoy ngudiuñän. Jaduhñä Dios hajxy xmiøødhídät tu'ugmädia'agy. Jaduhñ hoyhajt weenhajt hajxy xmió'owät.

¹⁰Xoondáacpøch je'eguiøxpä cooçh mijts jadähooc xpiuhbéjcumbä xädø'øñhaam. Páadyhøchä Dios jaduhñ nnäma'ay “Dioscujú'uyäp.” Jia tsojc ja'a mjoothajxy cooçh hajxy cu xpiuhbejty, pero cab hajxy xñä'ä näbaadøyyä. ¹¹Cábøch hänäjty ndsippäda'agy, hóyhøch hänäjty tii nja yajmaajiaty. Tøøch nhabøjnä nébiøch jootcujc nhíjnät, hóyhøch hänäjty tijaty nja yajmaajiaty. ¹²Cábøch nmøjpädaacnä mädyijátyhøch nyajmaajiajpy. Cábøch nøcxy nniguumayii cooçhä Dios xpiuhbety. ¹³Hotyíijøch njada'añ. Ja'a Jesucristøch homiänaajä xpiuhbejp. ¹⁴Hoyøøyy cooçh mijts xpiuhbejty xädø'øñhaam.

¹⁵Pero jadúhnhøch mijts naxy xñä'ägädä puhbetyhaty. Cooçh hänäjty jim ndsoona'añ Macedonianaaxooty, mänítøchä xädø'øñ hajxy hoy xmió'oy. Páadyhøch hajxy hoy xmió'oy cooçhä Diosmädia'agy jim hoy njaançh tehñ yajwa'xy jim maa mijtsän jim Filiposcajptooty. Cábøch wiinghäna'c-hajxy

hänäjty tii xñä'ägädä mo'owa'añ. ¹⁶Mänáajøch hänäjty jim nhityñä maa ja'a cajpt xiøhatiän Tesalónica, coo hajxy mmädoyhajty cooçh hänäjty nyajmaajiaty, metsc-hooc tægøøghøoc-høch xädø'øñ hajxy jim xyajnäguejxy. ¹⁷Cab hajxy mmäná'anät cóogøch tyijy xädø'øñ nwi'i quiuhbøcjuø'øy. Cooçh mijts xpiuhbety, paadiä Dios hajxy xmió'owa'añ hoyhajt weenhajt. Høøch, páadyhøch nxoonda'agy. ¹⁸Cábøch tii nyajmaajiajnä. Nä'ä tægø'øbøch mijts xyajnäguejxy, ja'a Epafrodito miäméjtsäbä. Xjiaançh tehñ quiumaabiä Dios hajxy jaduhñ cooçh hajxy xjiaançh tehñ piuhbety. ¹⁹Coo hajxy hänäjty tii myajmaajiaty, xmió'owäp ja'a Dios hajxy ja'a Jesucristocøxpä. Jim cøxiä miøødä tsajpootyp. ²⁰Tsøgä Dios hajxy nämáayyäm cøjxta'axiøø coo miøjjä coo jiaançhä; je'e hajxy nDeedyhajtäm. Amén.

²¹Ja'a hermanodøjc-hajxy yaabä, højts mijts nyajpoo'xyp pønjiatiä Diosmädia'agy jim mäbøjp Filipos. ²²Pønjiatiä Diosmädia'agy yaa mäbøjp, je'eds mijts xyajpoo'xp, møød hajxy yaa tuumbä maa ja'a gobiernä tiøjcän.

²³Weenä Jesucristo hajxy xmió'oy hoyhajt weenhajt. Je'e hajxy nWiindsønajtäm. Amén.